

**Uunga siunnersuut: Inuussutissat pillugit Inatsisartut inatsisissaat**  
(Aalisarnermut, Piniarnermut Nunalerinermullu Naalakkersuisoq)

**Saqqummiussissut**  
**Siullermeerneqarnera**

Naalakkersuisut sinnerlugit matumuuna Inuussutissat pillugit Inatsisartut inatsisissaattut siunnersuut saqqummiutissavara. Siunnersuutip kingunerissavai, Kalaallit Nunaanni inuussutissanut tunngasutigut nutaanik piffissamut naleqqunnerusunik malittarisassaqaarneq, siunissami tunitsivimmut namminermt nunatsinni inuussutissanik peqqinnartunik tunisassiornermik qulakkeerinnittussaq.

Inuussutissalerineq pillugu nutaamik inatsisiliornermut tunngaviuvoq inuussutissalerinermut tunngasutigut ukiut kingulliit sukkasuumik ineriartortoqarnera. Inatsisikkut Kalaallit Nunaata siumut sammisumik inuussutissanik pitsaasunik peqqinnartunillu pilersorneqarnissaa qulakkeerniarneqarpoq, kiisalu inuussutissatigut isumannaatsuunerup nunani tamalaani assigiissaarinernut sanillersuussinnaalernissaa qulakkiissallugu. Malittarisassat nunatsinni inuussutissanik ineriartortitsineq inuussutissanillu tunisassiorneq iluaqusissavaat innuttaasullu nunatsinni suliffinnut inuussutissanik tunisassiortunut tatiginninnerulersissallugit.

Inatsisit ersarinnerulersinniarlugit uumasut nappaataanik inunnut tunillaassorsinnaasunik taakkulu akuinik siaruaassinnaasunik akiuiniarneq aamma erngup pitsaasuunissaa pillugit immikkut inatsisiliunneqarput. Taamaattumik inatsisissatut siunnersuut manna taamaallaat inuussutissanut suliffeqarfinnullu inuussutissanik tunitsivimmut namminermt tunisassiortunut tunngavoq.

Inatsisissatut siunnersuut uumasunik nakorsaqaarnermt inuussutissalerinermullu annertuumik nutarterineruvoq. Siunnersuutikkut atuisut inuussutissanut ulorianarsinnaasunut kiisalu pile-risaarinernut uupakaatitsiniutaasunut illersorneqarnissaat, atuisut inuussutissanik qaffasissunik pitsaassusilinnik qulakkeerneqarnissaat, inuussutissanik nakkutilliinerup qulakkeerneqarnissaa anguniarneqarpoq aamma nakkutilliinermi inernerit tamanut ammasuunissaat kiisalu nunamit/kangerlummit nerrivimmut tunngaviup tapersersorneqarnissaa anguniarneqarluni.

Inatsisissatut siunnersuummi tunngaviusumik sinaakkusersuinissaq pingaartinneqarsimavoq, maleruagassanillu erseqqinnerusunik aalajangersaanissaq nalunaarutikkut pissalluni. Taamaalliortoqarpoq ullumikkumut naleqqunnerusunik inuussutissatigut malittarisassiornissamut inatsisitigut eqaannerusumik sinaakkusersiornissaq anguniarlugu.

Suliniutit nutaat ilaat tassaavoq Uumasunut Nakorsaqaarfik Inuussutissalerinermullu Oqartussaaffiup suliffeqarfinni inuussutissalerisunut nakkutilliartornerni akiliisitsisoqartalersinnaaneranut inatsimmi tunngavissiaq. Nakkutilliineq taanna pisariaqarluinnarpoq atuisut inuussutissanik pitsaasunik, peqqinnartumik assigiiaarineq qulakkeerneqassappat, tamanna nakkutilliinermi sunniuteqarfigineqartarmat. Toqoraavinnut neqinik nakkutilliinermi aningaasartuutit uumasumut toqunneqartumut ataatsimut 10-15 kr. akornanniissapput, apequtaalluni uumasup angissusia ullormullu toqorarneqartut amerlassusii. Ullormut

toqorarneqartut taamaaqataanik amerlatigineq ajormata, nakkutilliisullu tunitsivinnut nalinginnaasumik arlaleriarlutik angalasarmata tunitsivinni neqinik nakkutilliineq akisunerusinnaavoq. Tamanna isumaqarpoq, tunitsivinni neqinik nakkutilliinermi uumasumut tunineqartumut ataatsimut aningaasartuut 100-300 kr. missaan-niissinnaasoq. Atuisunik akiliuteqartitsinerup atorneqarnera nunani avannarlerni allani nalinginnaasuvoq.

Suliffeqarfiit inuussutissalerisut atuinermi akiliisalertussanngornerisigut inuussutissat akisunerulernerannik kinguneqassasoq eqqortuuvoq. Taamatulli suliniuteqarneq pisariaqalerpoq, Uumasunut Nakorsaqqarfik Inuussutissalerinermullu Oqartussat nakkutilliinerit matussu-  
sernissaannut naammattunik aningaasaateqanngimmata. Uumasunut Nakorsaqqarfik Inuussutissalerinermullu Oqartussaaffiup taamatut aningaasartuuteqartuassaguni oqartussaaffiup siunissami amerlanerujussuarnik aningaasalersorneqartariaqarpoq nukissanillu pilersorneqartariaqarluni.